

**Arkiv:**

<arkivID><jplD>  
Plannavn-  
Kommunedelplan  
for oppvekst - Alver  
kommune, Komnr-  
4631

**JournalpostID:**

**Sakshandsamar:**

**Dato:**

31.01.2022

Saksframlegg

| Saksnr. | Utval                                  | Møtedato   |
|---------|----------------------------------------|------------|
| 003/22  | Ungdomsråd                             | 07.02.2022 |
| 019/22  | Utval for oppvekst, kunnskap og kultur | 08.02.2022 |

### **Kommunedelplan for oppvekst - hovudmål i planen**

#### **Rådmannen sitt framlegg til vedtak:**

Framlegg til hovudmål for kommunedelplan oppvekst blir vedteke slik dei er presentert i saka.

#### **Ungdomsråd 07.02.2022:**

#### **Handsaming:**

Orientering i saka v/Kristin Moe.

#### **UR- 003/22 Vedtak:**

Ungdomsrådet støttar rådmannen sitt framlegg til vedtak.

#### **Politisk handsaming**

Saka skal til uttale i ungdomsrådet.

Saka skal avgjerast i utval for oppvekst, kunnskap og kultur.

#### **Bakgrunn**

Alver kommune held på med planprosess i høve til kommunedelplan for oppvekst. I kommunedelplanen skal ein følgje opp relevante målsetjingar frå samfunnsplanen og det skal etablerast hovudmål, delmål og strategiar for oppvekst, samt ein handlingsplan dei første fire åra i planperioden.

Prosjektgruppa for kommunedelplan oppvekst har arbeidd med målsetjingane for planen, og desse vart lagt fram for referansegruppa i slutten av november 2021. Etter innspel frå referansegruppa vart det gjort nokre endringar i høve til prosjektgruppa sitt utgangspunkt.

I høve til framdrift i arbeidet, er målsetjinga å fastsetje hovudmåla for kommunedelplanen i februar, slik at prosjektgruppa kan arbeide vidare med delmål og strategiar ut over våren. Det er ønskjeleg å ha delmål og strategiar til politisk handsaming før planen blir sendt til høyring.

Undervegs i arbeidet blir referansegruppa, ungdomsrådet, tilsette i sektoren og barn/unge/føresette viktige bidragsytarar i arbeidet. Så langt har vi hatt gode erfaringar i høve til medverknad frå desse gruppene.

#### **Saksopplysninger:**

I prosessen har det vore jobba med fleire hovudtema eller kategoriar i høve til det å hente innspel til planen. Våren 2021 vart det gjennomført ei intern undersøking om kva tilsette opplever er styrkar og utfordringar i høve til hovudkategoriane som var sett opp i planprogrammet. Resultatet etter denne undersøkinga er presentert i rapporten «Rapport frå intern undersøking – Prosjekt kommunedelplan oppvekst for perioden 2022-32».

Hovudkategoriane var som følgjer:

- Inkluderande fellesskap
- Tidleg innsats
- Læring, livsmeistring og utvikling
- Tverrfagleg samarbeid
- Fattigdom i barnefamiljar
- Heilskaplege tenester
- Digitalisering
- Helsefremjande oppvekst

Det vart i tillegg gjennomført sju medverknadsmøte med representantar frå elevråda, ungdomsrådet, politi, bup, psykisk helse, foreldrerepresentantar frå private og kommunale barnehagar og skular, tilsette i PPT, barnevern, helsestasjons- og jordmortenesta samt kulturavdelinga. Tilsette i private og kommunale barnehagar og skular, styrarar i kommunale og private barnehagar og rektorar i kommunale skular deltok også i denne medverknadsprosessen.

I medverknadsprosessen har deltakarane vore delt i grupper og diskutert styrkar/fortrinn og utviklingspotensiale/ulempes/svakheiter ved kommunen, relatert til oppvekstsektoren og relevante hovudmål i kommuneplanen sin. Hovudmål 3 og 4 er særleg aktuelle for kommunedelplanen for oppvekst.

Resultatet etter denne medverknadsprosessen er presentert i rapporten «Kommunedelplan for oppvekst – Innspel frå referansegrupper våren -21».

Innspela som kom fram i medverknadsprosessen er strukturert i fire hovudkategoriar:

- Trygg oppvekst
- Likeverdig og god opplæring
- Helsefremjande oppvekst
- Tilhøyrse til nærmiljøet

Hausten 2021 har prosjektgruppa jobba med å få systematisert og analysert innspela som kom fram gjennom desse to medverknadsprosessane saman med andre innspel undervegs. Det har vore jobba med å utforme hovudmål i samsvar med målsetjingar i samfunnsplanen og det har blitt etablert eit arbeidsdokument for skriveprosessen i Framsikt.

Hausten 2021 (november) vart følgjande utkast til hovudmål presentert for referansegruppa:

1. Barn og unge i Alver opplever eit trygt oppvekstmiljø og å ha god helse
2. Barn og unge i Alver opplever å vere inkludert i fellesskapet i barnehage, skule og på fritidsaktivitetar
3. Barn og unge i Alver opplever meistring, utvikling og læring

Referansegruppa kom med gode og viktige tilbakemeldingar på arbeidet så langt. Dei oppfordra prosjektgruppa om å vere så konkret som mogleg i formuleringane, slik at det var mogleg å måle i kor stor grad vi lukkast med målsetjingane. Det vart stilt spørsmål om det var mogleg å spisse måla meir. Eit anna innspel frå referansegruppa gjekk ut på at heim og familie burde få ein tydelegare plass i målsetjingane. Dette ut frå tanken om at heimen er den viktigaste arena for eit barn, og Alver kommune sin kommunedelplan bør spegle dette både i høve til hovudmål og samarbeid.

I møtet kom det fram fleire innspel som gjekk på temaet tidleg innsats, tverrfagleg samarbeid og heilskap i tilbodet til barn, unge og familien.

Fleire var også opptekne av å ruste barn og unge til å møte framtida, sikre dei kompetanse for morgondagen.

I møtet med referansegruppa spurde vi også om kva for område som kommunen bør prioritere inn i

den første handlingsdelen i planen, dei fire første åra. Her kom det innspel om å tilsetje fleire miljøterapeutar i skulen, etablere tverrfagleg team for førebyggjande arbeid rus og psykisk helse, etablere team for førebyggjande arbeid læringsmiljø i skulane, etablere tilbod om lågterskel foreldrerettleiing og at kommunen bør utarbeide eit strategi i høve til barn og unge si psykiske helse. Det kom også innspel om å etablere eit demokratiprogram for alle skulane i kommunen og at det er behov for møteplassar for fagleg utveksling og samarbeid. I høve til informasjon og kommunikasjon med innbyggjarane, vart det presisert at kommunen bør ha som målsetjing å informere godt om hjelpetiltak og tilbod til barn, unge, vaksne i kommunen. Desse konkrete innspela i høve til prioriteringar i første periode av kommunedelplanen vil bli arbeidd med ut over våren 2022.

### **Framlegg til hovudmål i kommunedelplan for oppvekst**

Innspel samla inn gjennom undersøking, medverknadsmøte og referansemøte i 2021 har samla sett utgjort ein viktig del av kunnskapsgrunnlaget for arbeidet med kommunedelplan oppvekst, saman med anna informasjon som er relevant i planprosessen.

Etter ei heilskapleg vurdering av innspel, analysearbeid knytt til kommunedelplan for oppvekst, saman med målsetjingane for samfunnsdelen, presenterer prosjektgruppa følgjande framlegg til hovudmålsetjingar i kommunedelplan for oppvekst:

1. Barn og unge har ein helsefremjande og inkluderande oppvekst
2. Barn og unge får god omsorg i heimen
3. Barn og unge får kompetanse og ferdigheiter til å møte framtida
4. Barn, unge og familiar med særlege utfordringar får koordinert støtte og oppfølging

Prosjektgruppa vil arbeide vidare med å konkretisere delmål som støttar opp om hovudmåla samt utarbeide skildringar av korleis vi vil jobbe for å nå desse måla. Det er lagt opp til at dette blir lagt fram for politisk før utkast til kommunedelplan for oppvekst blir sendt ut på høyring.

### **Vedlegg i saken:**

|            |                                                                                |         |
|------------|--------------------------------------------------------------------------------|---------|
| 01.02.2022 | vedlegg til politisk sak kdp-oppvekst_rapport-innspel-medverknad-referansemote | 1683105 |
| 01.02.2022 | vedlegg 2 til kdp-oppvekst_rapport_intern-undersoking_v_08_2021                | 1683106 |